

Supervizor za Brčko Jonathan Mennuti i zamjenik podsekretara UN-a Raffi Gregorian: Saradnja i odgovornost imaju suštinski značaj za sigurnost i prosperitet BiH i Brčko Distrikta



Prvi zamjenik visokog predstavnika i supervizor za Brčko Jonathan Mennuti sastao se danas sa zamjenikom podsekretara Organizacije Ujedinjenih naroda i direktorom Ureda UN-a za borbu protiv terorizma (UNOCT) Raffijem Gregorianom.

Tokom sastanka razgovaralo se o aktuelnim političkim dešavanjima i evroatlantskom putu BiH, o sigurnosnom okruženju u Bosni i Hercegovini (BiH) i regionu, kao i o uznemirujućim i sve prisutnijim izjavama koje karakterizira govor mržnje, dezinformacije, mizoginija i negiranje genocida.

Sagovornici su se saglasili da su institucije BiH općenito efikasne u rješavanju terorističkih prijetnji, ali je uz to potreban i pristup na nivou cjelokupnog društva koji podržava Generalna skupština UN-a. U ovom kontekstu, Gregorian je posebno naglasio važnost pristupa koji je u skladu s ljudskim

pravima jer je to jedini efikasan način da se istinski pobijedi terorizam i nasilni ekstremizam. "Uznemirujuće je da neki nadležni mogu doći u iskušenje da borbu protiv terorizma koriste kao izgovor za sužavanje građanskog prostora djelovanja ili ograničavanje slobode izražavanja", rekao je Gregorian. "Takav pristup na kraju uvijek ima suprotan efekat", dodao je Gregorian.

Zamjenik podsekretara UN-a Gregorian, koji je ranije obavljao dužnost prvog zamjenika visokog predstavnika i supervizora za Brčko, također je podijelio svoja iskustva u pogledu odvijanja provedbe Konačne odluke i pružanja podrške tom procesu. Mennuti i Gregorian su se složili da je važno održati pozitivan tempo u provođenju reformi u Brčkom, kao i potencijal Distrikta da posluži kao model za druge dijelove BiH.

Na kraju, sagovornici su naglasili potrebu da ovom ključnom trenutku svi glavni akteri u BiH pristupe odgovorno i u duhu saradnje.